

**Uunga siunnersuut: Kalaallit Nunaata imartaani akisussaaffeqarfiusumi  
inuussutissarsiornikkut ingerlataqartarneq pillugu Inatsisartut inatsisaat nr. xx, yy  
2015-imeersoq**

**pillugu**

**Inuussutissarsiornermut Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Inuussutissarsiornermut Ataatsimiititaliap suliarinninnermini ilaasortarai:  
Inatsisartunut ilaasortaq Siverth K Heilmann, Atassut, siulittaasoq  
Inatsisartunut ilaasortaq Aqqaluaq B Egede, Inuit Ataqatigiit, siulittaasup tullia  
Inatsisartunut ilaasortaq Justus Hansen, Demokraatit  
Inatsisartunut ilaasortaq Suka K Frederiksen, Siumut  
Inatsisartunut ilaasortaq Iddimanggiu Bianco, Inuit Ataqatigiit

**1. Siunnersuutip imarisaa siunertaalu**

Siunnersuutip siunertaraa sivisunerusumik inuussutissarsiornikkut ingerlatat Kalaallit Nunaata imartaani akisussaaffeqarfiusumi ingerlanneqartut Naalakkersuisunit akuersissuteqarfigineqarnissaasa piumasaqaataanerata maleruagassiuunneqarnissaa aammalu akuersissummut taamaattumut atugassarititaasussanik piumasaqaateqartoqarsinnaasoq.

Inuussutissarsiornikkut ingerlatatut isigineqarnissamut ingerlatassap niuerneramik siunertaqarnissaa aammalu inatsisini allani imaluunniit nunani tamalaani isumaqatigiissutini, soorlu angerfigeqatigiissutini aamma nunani tamalaani isumaqatigiissutini, maleruagassiivigineqarsimanginnissaa pisariaqarpoq.

Umiarsuarmik nalinginnaasumik angalaneq kiisalu taakkunani inatsisit atorneqartussat ilaatigut immani pisinnaatitaaffiit pillugit imarsiornermut inatsimmi aamma nunani tamalaani isumaqatigiissummi pineqartunut ilaapput. Siunnersuummi taamaalilluni taamaallaat

ingerlatat nalinginnaasumik imaatigut angalanerup saniatigut ingerlanneqartut maleruagassiivigineqarput.

Inuussutissarsiornermut ingerlatanut maleruagassat nalinginnaasut, taamatutaaq Kalaallit Nunaata imartaani atuupput, taamaalilluni ingerlatassat suliarineqarnissaannut sulinermi avatangisit pillugit Kalaallit Nunaanni maleruagassat atuullutik.

## **2. Siunnersuutip Inatsisartuni siullermeerneqarnera**

Inatsisissatut siunnersuut partiinit ataatsimut isigalugu taparserneqarpoq, taamaakkaluartooq inatsisissatut siunnersuutip oqaasertaliorneqarnera aalajangersakkallu ilaasa erseqqissusiat pillugit ataasiakkaanik oqaaseqaateqartoqarluni. Ajornartorsiut tamanna sulinermi paasinarsisinniaqqullugu Inuussutissarsiornermut Ataatsimiititaliaq kaammattorneqarpoq.

## **3. Apeqqutit**

Ataatsimiititaliaq siunnersuummik suliarinninnermini inatsisissatut siunnersuummi tunngavigineqartunik ataasiakkaanik qulaajaanissaq paasinninnissarlu siunertaralugit Naalakkersuisunut apeqquteqarsimavoq.

## **4. Siunnersuutip ilusiligaanera**

Inatsisissatut siunnersuutip misissornerani Naalakkersuisut allannguutissatut siunnersuutini marlunnik saqqummiussinissaat pisariaqartinneqartoq Inuussutissarsiornermut Ataatsimiititaliaq isumaqarpoq:

Inatsisissatut siunnersuut UKA15-imi siullermeerneqarpoq. Inatsisissatut siunnersuut 1. januar 2016-imi atuutilissasoq inatsisissatut siunnersuutip atuutilerfissaa pillugu aalajangersakkami allassimavoq.

Siunnersuutip matuma aappassaaneernejarnissaanut inatsisip atuutilerfissaa pillugu allannguutissatut siunnersuummik saqqummiusseqqullugit Naalakkersuisut Inuussutissarsiornermut Ataatsimiititaliamit qinnuigineqarput.

§ 4, imm. 4-mi allassimavoq. ”Naalakkersuisut VSB-ip suliarineqarnera kiisalu taanna pillugu nassuiaammik suliaqartarnej pillugit aalajangersakkannik erseqqinnerusunik aalajangersaasinnaapput”.

Inatsisissatut siunnersuut matumani pineqartoq naapertorlugu Naalakkersuisut aalajangersagaliulersaartut siuliani allassimavoq. Taamaaliornissamulli inatsisissatut siunnersuummi inatsisitigut ersarissumik tunngavissiisoqarsorinangilaq.

Inatsisissatut siunnersuut naapertorlugu aalajangersakkanik erseqqinnerusumik aalajangersaasinnaanermut inatsisissatut siunnersuutip pisariaqartinneqartunik tunngavissiisinnaaneranik qulakkeerisumik allannguutissatut siunnersuummik siunnersuutip matuma aappassaaneerneqarnissaanut saqqummiusseqqullugit Naalakkersuisut Inuussutissarsiornermut Ataatsimiititaliamit qinnuigineqarput. Taamaaliorsinnaanatik Naalakkersuisut isumaqarunik tamanna inatsisissatut siunnersuutip aappassaaneerneqarnissaanut akissuteqaamminni nassuiaateqarfigeqqullugu Naalakkersuisut qinnuigineqarput.

#### **4.1 Inatsisissatut siunnersuummut nassuiaatit**

Inuussutissarsiornermut Ataatsimiititaliap suliaminut atatillugu inatsisissatut siunnersuummut nassuiaatit aamma misissorpai. Inatsisissatut siunnersuut sinaakkutitut inatsisaavoq sinerissamiit avammut 3 sòmilmik killeqarfiup iluani inuussutissarsiornikkut ingerlatat ilaannut maleruagassiornissaq siunertaralugu Naalakkersuisunut arlalinnik piginnaatitsisoq. Paatsoortoqaqqunagu oqaatigineqassaaq Kalaallit Nunaata imartaani akisussaaffeqarfiusumi aalisarnikkut ingerlatat ingerlatallu allarpasuit inatsisissatut siunnersuummi maleruagassiorneqanngimmata.

Inatsisissatut siunnersuummut nassuiaatit inatsisip aalajangersimasup paasineqarnissaanik siunertaanillu itisiliissutitut atorneqartarput. Tassunga atatillugu inatsisissatut siunnersuummut matumunnga nassuiaatit ataasiakkaat suliarineqarnerat peqqissaarunneqarnerusimasinnaagaluartoq Inuussutissarsiornermut Ataatsimiititaliaq isumaqarpoq. Inatsisissatut siunnersuummit matuma kinguliani allassimasumik issuaanermigut suna pineqarnersoq takussutissiussallugu ataatsimiititaliap tunngavissaqarsoraa.

Inatsisissatut siunnersuummi § 1-imi allassimavoq:

*§ 1. Inuussutissarsiornikkut sivisunerusumik ingerlataqarnerit Kalaallit Nunaata imartaani akisussaaffeqarfiusumi umiarsuarnit suliarineqartut Naalakkersuisunit akuersissuteqarfigneqarnissaat pisariaqarpoq.*

Aalajangersakkamut nassuiaat ima oqaasertaqarpoq:

*Aalajangersakkami aalajangersarneqarpoq, sivisunerusumik inuussutissarsiornikkut ingerlatat Kalaallit Nunaata imartaani akisussaaffeqarfiusumi umiarsuarmit suliarineqartut, Naalackersuisunit akuersissummik peqarfigineqarnissaat piumasaqaataasoq. Inuussutissarsiornermi ingerlatatut isigineqarnissamut, ingerlatap niuerneramik tunngaveqartumik siunertaqarnissaa aammalu inatsisini allani imaluunniit nunani tamalaani isumaqatigiissutini, soorlu angerfigeqatigiissutini, nunani tamalaani isumaqatigiissutini ilaalu ilanngullugit, maleruagassiivigineqarsimanninnissai pisariaqarpoq. Akuersissummik peqarnissamik piumasaqaateqarnermi, taamaallaat ingerlatassat kissaatiginartut suliarineqartarnissaat qulakkeerpeqassaaq.*

*Sivisuumik paasineqassaaq tassaasoq inuussutissarsiutitut ingerlatassaq sumiiffimmi ataatsimi piffissami sivisunerusumi ingerlanneqartussatut kissaatigineqartoq. Sivikitsumik ingerlataqarnerit ataasiaannartumik pisut taamaalillutik siunnersuummi pineqartunut ilaatinneqanngillat.*

Taamaalilluni oqariaaseq ”piffissaq sivisunerusooq” qanoq kinguneqassanersoq inatsissatut siunnersuummi ersarissumik allassimannilaq. Inuussutissarsiutinik ingerlatsisut namminersortut inatsimmi tassani ilaatinneqarsinnaasut ingerlatassatut kissaatigisartik inatsimmi ilaatinneqarnersoq ilaatinneqannginnersorluunniit ersarissumik takusinnaanngilaat. Taamaattumik nalunaarummik aalajangersakkanut siuliani taaneqartunut nassuiaataallunilu erseqqissaataasumik atuutsitsilernissaq isumaliutigeqqullugu Naalackersuisut Inuussutissarsiornermut Ataatsimiititaliamit **kaammattorneqarput**.

#### **4.2 Tusarniaaneq**

Siunnersuut piffissami 2015-imi 3. juunimiit 29. juunimut tusarniaanermut nittartakkamiitinneqarpoq kiisalu oqartussaasunut, kattuffinnut suliffeqarfinnullu makkununga tusarniaassutigineqarluni:

Naalackersuisoqarfinnut tamaginnut, KANUKOKA-mut, Søfartsstyrelsimut, Arktisk Kommandomut, NUSUKA-mut aamma Sulisitsisunut (GE).

Ukuninnga tusarniaanermut akissuteqaat tiguneqarpoq:

Naalackersuisut Siulittaasuata Naalackersuisoqarfia, Ilaqutariinnermut, Naligiissitaanermut

Isumaginninnermullu Naalakkersuisoqarfik, Peqqissutsimut Naalakkersuisoqarfik, Pinngortitamut, Avatangiisinut Inatsisinillu Atuutsitsinermut Naalakkersuisoqarfik, GE, KANUKOKA, Søfartsstyrelsi aamma Arktisk Kommando.

#### **4.3 Inuussutissarsiornermut Ataatsimiititaliap tusarniaanermut oqaaseqaatai**

Piffissaq tusarniaaffiusoq sivikippallaaluatsiartuq Inuussutissarsiornermut Ataatsimiititaliap isumaqarpoq. Naalakkersuisut tusarniaaffigisanik oqaloqateqarnerannit erserpoq inatsisissatut siunnersuutip inatsisinut allanut sanilliullugu killissaa taakkunanit nalornissutigineqartoq. Inatsisissatut siunnersuutip killissai nalinginnaasumik nassuiaatini Naalakkersuisut ajunngilluinnartumik nassuiarpaat. Tassunga atatillugu inatsisissatut siunnersuutip siunertarpiaa tusarniaaffigisanut taamatut aamma ersaritsigisumik Naalakkersuisut nassuiaatigisimasuuppasuk pitsaasimassagaluarpog.

#### **5. Ataatsimiititaliap siunnersuummik suliarinninera**

Ataatsimiititaliap aallarniutigalugu inatsisissatut siunnersuutip matuma UKA15-imi siullermeerneqarnera innersuussutigissavaa, tamatumani siunnersuutip siunertarisaa anguniakkallu ataatsimut isigalugu taperserneqarlutik. Aatsitassarsiornermut atatillugu siunissami ingerlanneqarsinnaasut eqqarsaatigalugit Kalaallit Nunaata imartaani akisussaaffeqarfiusumi inuussutissarsiornikkut ingerlatanut maleruagassiornissaq isumatusaarnerusinnaasog Inuussutissarsiornermut Ataatsimiititaliap isumaqarpoq. Ingerlatat taamaattut maleruagassiornissaat ilaatigut inatsisissatut siunnersuutikkut anguniagaasog Naalakkersuisut ataatsimiititaliamut akissutaanni allassimavoq (takuuk isumaliutissiisummut ilanngussaq).

2. Nunatta imartaani saviminissap usilersuutigeqqittarnissaanut tunngasumik

Naalakkersuisut piviusumik saaffiginnissummik tigusaqarsimapput.

Suliniut piviusoq tusarniaanermut nittartakkami takuneqarsinnaavoq:

<http://naalakkersuisut.gl/da/H%c3%b8ringer/Arkiv-over-h%c3%b8ringer/2015/Baffinland>

Aammattaaq aatsitassanik usilersuusseqqinnermut tamatumunngaluunniit assingusumik ingerlataqarnermut atatillugu VVM-imik suliaqartoqartarnissaata piumasaqaatigineratigut avatangiisinik illersuinissamat inatsisissatut siunnersuut una aqutigalugu Naalakkersuisut piareersimaniarnerat ataatsimiititaliamit pitsaasutut isigineqarpoq.

Ingerlatassaq ingerlatassalluunniit sorliit maleruagassiunneqarniarnersut inatsisissatut siunnersuummut nalinginnaasumik nassuiaatini taasaqarfineqarsimappata naatsumilluunniit

nassuiaatigineqarsimappata inatsisissatut siunnersuummi siunertarisaq anguniakkallu tigussaannerusumik paasineqarsinnaanerannut iluaqutaassagaluartoq Inuussutissarsiornermut Ataatsimiititaliaq isumaqarpoq. Naalakkersuilli Inuussutissarsiornermut Ataatsimiititaliamut akissuteqaamminni inatsisissatut siunnersuuteqarnerminni siunertarineqartoq naammaginartumik ersarissuseqartumik nassuiaatigigaat Inuussutissarsiornermut Ataatsimiititaliaq isumaqarpoq.

#### **6. Siunnersuutip aningaasaqarnikkut kingunerisassai**

Siunnersuutip aningaasaqarnikkut kingunerisassai Naalakkersuisut siunnersuummi nassuiaatigaat. Inatsisissamik piareersaallutik suliaqarnerminni apeqquut tamanna Naalakkersuisut sukumiisumik paasinarsisissimagaat ataatsimiititaliamit tutsuigineqarpoq. Taamaattumillu annertunerusumik oqaaseqaateqarnissamut ataatsimiititaliaq tunngavissaqarsorinngilaq.

#### **7. Ataatsimiititaliap inassuteqaatai**

Ataatsimiititaliap isumaqatigiittup siunnersuut akuerineqassasoq.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Siverth K. Heilmann,  
Siulittaasoq

---

Aqqaluaq B. Egede,  
Siulittaasup tullia

---

Justus Hansen

---

Suka K. Frederiksen

---

Iddimangiiu Bianco